



dass dat zu engem multilateralen Dialog ka féieren an dass et op deem Wee zu enger kompletter nukleärer Ofërschtung vun Nordkorea komme kann. D'Awierke vu China a vun Amerika wäert hei eng kruzial Roll spillen.

Et huet sech leider och iwwert déi lescht Méint bestätegt, wat vill vun eis gefaart hunn: Amerika ass amgaangen, sech lues a lues aus de multilateralen Enceinten zrëckzezéien, wat dramatesch ass.

Elo huet déi amerikanesch Regierung ugekënnegt, sech wellen aus dem Paräisser Klimaccord zrëckzezéien. D'Amerikaner huelen och net méi deel un de Verhandlungen um Niveau vun der UNO fir e globale Pakt fir sécher, fir geuerdnet a fir regulär Migratioun.

Dës Administratioun interesséiert sech weéng fir d'Definitioun an d'Verdeedegung vun de multilaterale Regelen, déi mir zesummen awer säit dem Zweete Weltkrich ausgeschafft hunn an déi notament am Kader vum Fräihandelsofkommes fir all Parteien am Respekt vu gemeinsame Wäerter Benefisser solle schafen. Am Géigendeel, de President Trump a seng Regierung fuere ganz einfach nëmmen op der Schinn vun „America first“.

Dëst stellt déi transatlantesch Partnerschaft, zu där mir weiderhin zu honnert Prozent stinn, virun nei Erausforderungen. Trotz dëse Schwierigkeete geet et méi wéi jee drëm, den Dialog proaktiv ze sichen.

Um amerikanesche Kontinent wëll ech awer och eis Partnerschaften mat Länner aus Latäinamerika, besonnesch Mexiko a Chile, an dem Mercosur ervirsträchen. D'Europäesch Unioun wëllt dës strategesch Partnerschaften verdéieren duerch nei politesch an ekonomesch Accorden, déi eis demokratesch a sozial Valeuren um internationalen Niveau verankeren.

Den Accord iwwert de politesch Dialog an d'Kooperatioun tëschent der Europäesch Unioun a Kuba ass jo säit dem leschte Joer a Kraaft. D'Chamber huet am Januar dëst Joer den Accord ratifizéiert an den Accord mécht en neit Kapitel an der Relatioun tëschent der Europäesch Unioun a Kuba op, andeems en et erméiglecht, dass duerch de politesch Dialog an déi sektoriell Kooperatioun op wichtege Dossier, wéi d'Mënscherechter oder d'ökonomesch Reformen, zesummegegräift gëtt.

Dat ass ëmsou méi wichteg an enger Zäit, wou den Zesammenhalt op Basis vu gemeinsame Wäerter och a Latäinamerika gelidden huet, opgrond vun der Situatioun am Venezuela. Dëst Land entwéckelt sech ëmmer méi zu engem autokratesche Regime ënnert dem Maduro, dee säit dem August vum leschte Joer déi dräi Pouvoire kontrolléiert.

Déi humanitär Situatioun, an dat ass dat Schlimmst, gëtt ëmmer méi prekär. D'EU ënnerstëtzt d'Initiativen, fir en Dialog tëschent der Regierung an der Oppositioun hierzustellen, a mécht gläichzäiteg mat Sanktiounen Drock. Hei ass et wichteg, dass mer eis geschlossen als Europäesch Unioun fir eng demokratesch Entwécklung am Venezuela asetzen.

Et ginn awer och nach méi positiv Entwécklungen a Latäinamerika. Heizou gehéiert zweifellos de Friddensprozess a Kolumbien, deem trotz enger Rei Hürde virukënn. Mir mussen an den nächste Méint virun allem d'Präsidentchaftswahlen am A behalen. Si wäerten ee kritesche Moment duerstellen. Lëtzebuerg ënnerstëtzt de Friddensprozess och dëst Joer mat enger Kontributioun un ee Projet, deem d'Justiz an der Iwwergangszäit a Kolumbien stäipt. Mir bedeelegen eis weider um EU-Fong fir Kolumbien.

Mat der Ouverture vun eiser Ambassade zu Brasilia, eiser éischter Ambassade am südamerikanische Kontinent, wëllt Lëtzebuerg da seng politesch a seng ekonomesch Bezéiunge mat Brasilien a mat där ganzer Regioun verdéieren. Dir wësst, Brasilien ass grouss wéi e Kontinent. Et ass eng Regioun, déi fir eis Entrepreneuren ëmmer méi wichteg gëtt a mat där mer och historisch enk verwuerzelt sinn duerch eis Geschicht, duerch d'Geschicht vun der Stolindustrie.

Et gëtt haut eng grouss Unzuel vu Brasilianer mat Lëtzebuerger Ofstamung, déi ech och do

begéint hunn, déi stolz op hir Wuerzele sinn a sech aktiv dorunner bedeelegen, fir där Bezéiung mat Lëtzebuerg en neien Impuls och ze ginn. Bei der Aweigung vun eiser Ambassade den 1. Mäerz dëst Joer konnt ech selwer dës Dynamik gesinn a mer e Bild maache vum Räichtum vun deene Liene mat Brasilien.

Fir déi transatlantesch Partnerschaft a fir eis Sécherheet spillt natierlech d'NATO eng zentral Roll. D'Somme vu Wales a vu Warschau 2016 hunn déi prinzipiell Richtung virginn. Lëtzebuerg dréit säin Deel zur kollektiver Verdeedegung bäi - ech soen: kollektiver Verdeedegung, näischt aneres. Mir hunn aktiv bei der Réckversicherung matgemaach, notament mat der Stationéierung vun engem Lëtzebuerger Kontingent a Litauen, a mir wäerten dat och weider maachen.

An der Europäescher Unioun ass Enn d'lescht Joer ee wichteg Schrëtt no vir gemaach ginn. Lëtzebuerg huet déi stänneg strukturéiert Zesummenaarbecht, déi mer jo PESCO nennen, matlancéiert. Mir gehéieren domadder zu deene Länner, déi eng méi enk Kooperatioun an der europäescher Defense ustriewen. Dee Schrëtt war néideg, fir eis Investissemter, eis Recherchen, eis Capacitéiten als Europäer méi koordinéiert an effikass virunzedriewen. Fir Lëtzebuerg ass et och ganz kloer: Eng staark EU-Defense stäerkt och d'NATO.

Ech wëll hei nach eng Keier drop hiweisen, dass ee sech net op d'Fro vun den 2% dierf fokusséieren fir d'NATO. Sécherheet ass net nëmmen Affär vun Defense. Wa Lëtzebuerg 1% vu sengem RNB an d'Entwécklungshëllef an an d'humanitär Hëllef investéiert, dann dréit dat och zur Sécherheet bäi. A wa vill Länner dat géife maachen, wiere vill manner Konflikter op der Welt.

► **Une voix.** - Très bien!

► **M. Jean Asselborn, Ministre des Affaires étrangères et européennes.** - Am Sënn vun der „3D“-Approche bedeelegt mir eis weider un zivillen a militäresche Missiounen. Sief dat en Demineur an Afghanistan, e Polizist am Niger, e Patrouleflieger iwwert dem Mëttelmier, wéi ech gesot hunn, en Ennerrafféier an der EU-Trainingsmissioun am Mali oder d'Capacitéite fir d'Satellitkommunikatioun: Lëtzebuerg péckt un a gëtt vu senger Partner och als verantworten als solidareschen Akteur ugesinn.

Responsabel sinn, heescht och, sech fir eng méi sécher Welt mat manner Waffen asetzen. Mir maachen dat!

An den nächste Méint wäert een neit Gesetz a Kraaft trieden, dat eisen nationale Kader fir d'Exportkontroll vu sensibelen Gidder moderniséiert. Deemno wäert eng gemeinsam Entschuedung vum Wirtschaftsminister a vum Ausseminister néideg sinn, fir sécherzestellen, dass militäresch Equipementer oder aner sensibel Wueren net iwwer Lëtzebuerg op Plazen transportéiert ginn, wou de Risiko besteet, dass se géife fir Violatiounen vum internationale Recht gebraucht ginn.

Dat entsprécht eisen Obligatiounen ënnert dem ATT, dem internationale Vertrag, deem de Waffenhandel reguléiert.

Handel, Export, Transit: Trotz eiser globaliséierter Welt bleiwen déi bilaterale Bezéiunge mat eisen Nopeschlänner ganz wichteg. Dir wësst, dass d'Benelux-Unioun dëst Joer hir 60. Joer feiert. Hei kucke mer, dass ons dräi Länner d'Kooperatioun op déi Secteure konzentréieren, déi de Bierger konkret eppes bréngen.

Mir beméien eis an deem Kader, zesumme mam Wirtschaftsministère, géint zum Beispill territorial Restriktiounen virzegoen, déi eis Einzelhändler zu Lëtzebuerg um internationale Plang benodeelegen. Gemeinsam Benelux-Visitten a -Stellungsname weisen ganz kloer, dass mer zesumme méi Afloss hunn a méi beweegen kënnen. De Benelux soll weider hirer Roll als europäesche Laboratoire gerecht ginn.

Wësse mussen mer allerdéngs, Här President, dass et ënner anerem Froe gëtt a Saachen EU-Reformen, wou et Divergenze ginn tëschent de Benelux-Länner, zum Beispill déi hollännesch Positioun a Saache Finanzmëttel vun der EU no 2020. Lëtzebuerg deelt déi Positioun net.

Am 60. Joer vun der Benelux-Unioun huet Lët-

zebuerg fir d'éischte Keier eng gemeinsam Institutioun kënnen empfänken: de Benelux-Gerichtshaff. Dëst ass kohärent mat der Entwécklung vun engem internationale Kompetenzcenter am Justizberäich zu Lëtzebuerg a spigelt och déi wuessend Bedeitung vun deem Gericht erëm. Mat senger Politique du siège schafft Lëtzebuerg weiderhin drun, fir d'Präsenz vun den europäeschen an den internationalen Institutiounen, déi hire Sëtz hei am Grand-Duché hunn, ze konsolidéieren an och weider ze entwéckelen.

Mat der Europäescher Kommissioun gi mir eis drun, fir den Accord ëmzesetzen, wat jo net esou einfach ass, deem ech 2015 mat der Kommissärin Kristalina Georgieva ofgeschloss hunn. An deem Accord hate mer jo ënner anerem festgehalen, dass d'Kommissioun hir Präsenz an dräi Beräicher géif ausbauen: am finanziellen, juristeschen an digitale Beräich. Den Accord ass wichteg fir Lëtzebuerg a mir gesinn do vill Komplementaritéit mat der Entwécklung vun eiser Wirtschaft a vum Standuert Lëtzebuerg. D'Adoptioun vum Reglement d'lescht Joer iwwert d'Schafe vum europäesche Parquet, an deem Lëtzebuerg als Siège confirméiert gëtt, ass och eng gutt Nouvelle fir eist Land. Nieft der Europäescher Cour de justice an dem Tribunal gëtt esou de juristesche Pôle hei zu Lëtzebuerg verstärkt.

2018 ass och ee wichteg Joer fir d'NSRF, fréier hu mer dat NAMSA genannt, d'NATO-Agence, déi hire Sëtz zu Capellen huet. Si feiert dëst Joer de 60. Anniversaire vun hirem Bestoen an de 50. Anniversaire vun hirer Präsenz hei zu Lëtzebuerg. Mir sinn houvreg, dass mer si hei hunn. Et ass eng Agence mat weiderhi vill Potenzial an eis Zesummenaarbecht ass ausgezechent.

D'Lëtzebuerger Diplomatie steet am Dénsgscht vum Land selbstverständlech, vun de Bierger an och vun de Betriber. Si leescht esou hire Bäitrag zur Entwécklung vun eiser Wirtschaft.

Am Sënn vun enger dynamescher Diplomatie économique geréiere mer och eise Réseau vun Ambassaden, Konsulater, Handels- an Investmentbüroen, den LTIOen, déi vum Wirtschaftsministère ofhänken. Mir sinn elo an 32 Länner mat bilaterale Ambassade präsent, dobäi kommen nach eis stänneg Vertriedunge bei de multilateralen Organisatiounen, d'Koakkreditatiounen vun eisen Ambassaden, eis net resident Ambassadeuren, eis Generalkonsulater, eis Honorarkonsulater, eis Aussewirtschaftsberoder. Ech wëll op dëser Plaz soen, dass am ganze Réseau eis Mataarbechter mat vill Asaz schaffen.

Eis Wirtschaftsdiplomatie verfollegt ganz konkret Ziler. Am Kontext vu menger Visitt zu Lima zum Beispill Enn 2017 hunn d'Autoritéite vum Peru hiren Accord ginn, fir Lëtzebuerg vun hirer schwaarzer Lëscht ze sträichen, wat am Januar dëst Joer dann och geschitt ass. Änlech positiv Resultater gouf et mat Armenien. Esou Demarché si wichteg fir den internationalen Image vu Lëtzebuerg an hunn en Afloss op d'Konditiounen, ënnert deenen eis Betriber am Ausland operéieren kënnen. Den Ausseministère wäert sech och an Zukunft fir esou Ziler asetzen.

Entgéint deem, Här President, wat oft gemengt gëtt, ass d'Diplomatie net d'Konscht, fir ronderëm de Bräi ze schwätzen. Ee gudden Diplomat ass net deem, deem zweemol nodeckt, fir näischt ze soen, wéi e fréiere Premier aus Groussbritannien dat emol gesot huet.

D'Diplomatie brauch Éierlechkeet an eng gesond Dosis Franc-parler. Dialog, an dat ass jo d'Häerzstück vun der Diplomatie a vun der Aussepolitik, kann nëmme klappen, wann een och bereet ass, Tacheles ze schwätzen, also eng kloer Sprooch ze schwätzen an heiansdo och onbequem Wourecht ze soen. Dobäi muss een natierlech selwer och kënnen Kritik astiechen. Dat gëllt och fir Lëtzebuerg.

Virun zwee Méint war ech zu Genf, fir am Mënscherechtsrot eisen nationale Rapport vun dem Examen périodique universel virzustellen. Do hu vill Länner d'Wuert ergraff, ech mengen iwwer 80, fir déi Fortschreiter, déi eis Regierung an déi zoustänneg Verwaltungen gemaach hunn, ze luewen. Et sinn der awer och eng Rëtsch, déi konstruktiv Recommandatiounen gemaach hunn, wéi mer eis Politicke fir de Respekt an d'Förderung vun de Mënsche-

rechter zu Lëtzebuerg nach kéinte verbesseren. Dës Rotschlëi wäerte mer opgräifen, fir virunzekommen an dësem ganz wichtege Beräich.

Lëtzebuerg leeft vun engem multilaterale System, deem no der Regel vum Recht funktionéiert. A mir wellen an Zukunft weiderhin eis Verantwortung an deem System iwwerhuelen, am Asaz fir eis Wäerter a fir d'Mënscherechter.

Dës Mount gëtt Lëtzebuerg op Aluedung vu Chile a vu Kanada Member vun der Equal Rights Coalition, engem Grupp vu Länner, déi sech fir d'Rechter vun den LGBTI-Persounen staarkmaachen. Domadder gëtt eisen Engagement an deem Domän international och unerkannt.

Dëst Joer plange mir och, een internationalen Aktionsplang unzehuelen, fir d'UNO-Richtlinne fir d'Entrepreneuren an d'Mënscherechter ëmzesetzen.

Vu Mäerz 2019 bis Mäerz 2020 huet Lëtzebuerg d'Presidence vun der internationaler Allianz fir d'Erënnung un den Holocaust. Eis Presidence gëtt ënner anerem markéiert vun der Commemoratioun vum 75. Anniversaire vun der Befreiung vun Auschwitz. An enger Zäit, wou déi lescht Iwwerliewend vum Zweete Weltkrich eis verloossen, wëlle mer hëllefen, dass d'Memoire an d'Lektiounen vun der Schoah weiderliewen.

Dir wësst, dass Lëtzebuerg seng Kandidatur gestallt huet, fir an de Joren 2022 bis 2024 als Vollmember fir déi éischte Keier an eiser Geschicht Verantwortung am UNO-Mënscherechtsrot ze iwwerhuelen. Mir wellen e fiabelen, en engagierten a couragéierten Member vum héchsten Gremium vun der UNO fir d'Mënscherechter ginn.

Et ass och no eiser positiver Erfahrung, mengen ech, am UNO-Sécherheitsrot 2013-14, dass mer eis Gedanke gemaach hunn, an et ass déi Erfahrung vun 2013-14, déi eis dozou bruecht huet, eng nei Kandidatur fir de Sécherheitsrot ze stelle fir d'Joren 2031-32.

Dir gesitt, d'Lëtzebuerger Diplomatie huet net nëmmen d'Krise vun haut, mä och de long Terme am Bléck.

(**Interruption**)

Ech hunn dorobber gewaart!

► **M. Mars Di Bartolomeo, Président.** - Ech sinn hannerun lech.

► **M. Jean Asselborn, Ministre des Affaires étrangères et européennes.** - Wat d'Stärkt vun eiser Aussepolitik ausmécht, ass a mengen Aen d'Kontinuitéit an der Saach, d'Kontinuitéit am Engagement.

Dozou dréit d'Chamber, Här President, hiren Deel bäi, am Sënn vun der parlamentarescher Diplomatie. Dofir wëll ech lech och Merci soen.

Am Summer dëst Joer hätt den Nelson Mandela seng 100. Joer gefeiert. Den „Madiba“ huet inspiréiert duerch säi Courage an d'Dignitéit, mat där hien den Apartheidregime a Südafrika bekämpft huet an iwwerwonnen huet. Folgend Devise gëtt oft am Zesammenhang mam Nelson Mandela bruecht a se passt och op säi Liewenswierk: „It always seems impossible until it's done.“

Et bleift nach vill ze maachen, Här President, fir dass d'Welt esou dréit, wéi se misst, mä mat der richteger Astellung ass nach villes méiglech.


Ech soen lech Merci.

► **Plusieurs voix.** - Très bien!

► **M. Mars Di Bartolomeo, Président.** - Merci dem Här Ausseminister. Ech ginn lech Akt vun der Deklaratioun. A mer wäerte muer de Mëten eis Debatt iwwert d'Europa- an d'Aussepolitik féieren. Rendez-vous also muer de Mëten.

Mir ginn dann zum nächste Punkt vun eiselem Ordre du jour iwwer. Et geet ëm de Projet de loi 7086 betreffend eng Rei vu Mesuren am Aarbechtsrecht. An d'Rapportrice, d'Madamm Taina Bofferding, ass prett. Madamm Bofferding, Dir hutt d'Wuert.

6. 7086 - Projet de loi portant modification: 1) du Code du travail; 2) de la loi modifiée du 24 décembre



Suivez la Chambre des Députés sur Facebook, Twitter et Instagram





1996 portant introduction d'une bonification d'impôt sur le revenu en cas d'embauchage de chômeurs; 3) de la loi modifiée du 12 septembre 2003 relative aux personnes handicapées

Rapport de la Commission du Travail, de l'Emploi et de la Sécurité sociale

► **Mme Taina Bofferding** (LSAP), *rapportrice*.- Här President, Kolleeginnen a Kolleegen, dat Gesetz hei regruppéiert eng ganz Panoplie u Changementer, déi eben eist Aarbechtsrecht wäerten ergänzen a präzisieren.

Dës goufen am Kader vum CPTÉ diskutéiert a verhandelt, an Aarbechtsgruppen oder och tëschent der Regierung an de Sozialpartner. Dräi grouss Objektiv ginn hei suivéiert: Éischens, e bessere Schutz fir d'Salariëe mat hire Rechter. Zweetens, d'Verbesserung vum de Mesurë fir d'Integratioun vum de Chômeuren an den Aarbechtsmarché, notament fir déi méi vulnerabel. An drëttens, besser Connaissance iwwert d'Evolutioun vum Aarbechtsmarché, fir eben esou nach méi eng cibléiert Politik kënnen ze maachen.

D'Changementer, mat deene mer an Zukunft ebe fir Verbesserung wäerte suergen, awer och fir juristesche Kloecheet, sinn zum Beispill d'Lohnfortzahlung am Krankheitsfall, d'Demission vum Salarie am Fall vun enger Faute grave vum Employeur, Ännerunge bei der Aide au réemploi, d'Erhéijung vun der Aarbechtszäit fir Studenten oder och d'Aféierung vun enger Aide à la formation, fir nëmmen dës ze nennen.

Alleguerten déi eenzel Changementer kënn Der a mengem schréffleche Rapport noliese mat den néidegen Explikatiounen. A mengem mëndleche Rapport wäert ech elo haapt-sächlech op déi Punkten agoen, iwwert déi mer an der Kommissioun méi ausféierlech diskutéiert hunn an déi mer och deelweis amen-déiert hunn.

Den éischte Volet, fir d'Rechter vun de Salariee besser ze schützen, dat maache mer, wéi gesot, elo an Zukunft bei der Lohnfortzahlung, also beim Krankengeld während dem Congé de maladie. A betraff si Leit, déi weekends, sonndes oder owes schaffen. Sait der Aféierung vum Eenheitsstatut vum 2009 ginn et hei ganz vill Onkloecheeten, wat zu ville Recourse viru Geriicht gefouert huet. D'Fro dobäi war ëmmer, wat als Assiette, also als Grondlag fir d'Berechnung vum Krankengeld geholl soll ginn. D'Uerteeler hu gréisstendeels eng ganz breet Berechnungsgrondlag zréckbehalen. D'Bestëmmungen, déi elo hei am Projet de loi proposéiert ginn, sinn d'Resultat vu ganz laange Verhandlungen, wéi gesot, am CPTÉ an och an Aarbechtsgruppen.

Elo gëtt präziséiert, wéi d'Assiette jee no Situatioun berechent soll ginn. Bei engem Salarie, dee regelméisseg weekends, sonndes oder owes schafft, ass elo garantéiert, dass d'Moyenne vu senge Revenue geholl gëtt, fir eben d'Krankengeld ze berechnen.

D'Chambre de Commerce an d'Chambre des Métiers kritisieren an hirem Avis elo d'Modalitéiten vun der Lohnfortzahlung, obwuel si dës allerdéngs selwer matverhandelt haten.

Wichtig fir eis, mengen ech, soll awer sinn, dass mer mat dëse Gesetzesännerungen d'Lohnfortzahlung eben am Krankheitsfall nees wäerten aféieren, zwar differenzéiert, mä dass mer se awer trotzdem wäerte garantéieren.

E weidere Punkt fir d'Stärkung vun de Rechter vun de Salarieen ass virgesi bei der Demission vum Salarie am Fall vun enger Faute grave vum Employeur, zum Beispill wann dësen d'Pai net bezilt. No zwee Uerteeler vun der Cour constitutionnelle ass et wichtig, dass mer Ännerungen an eisem Aarbechtsrecht virhuelen. Deemo hunn an Zukunft d'Salarieen, déi wéinst eben enger Faute grave vun hirem Patron kënnegen, déiselwecht Rechter wéi bei enger sexueller Belästegung, wa se kënnegen. Dat heescht, wann hir Demission als berechtigt ugesi gëtt, hu si Urecht op déi normal Indemnité de préavis et de départ.

Weider schafe mer och Kloecheet, dass e Patron eventuell Chômageindemnitéiten un de Fonds pour l'emploi muss zréckbezuelen, eben am Fall vun enger Kënnegung pour faute grave, wann dës ebe vum Salarie justifiéiert ass, wat eigentlech och net méi wéi richteg därft sinn.

E weidere wichtige Punkt, wou mer d'Rechter, besonnesch déi vun deene Jonken, wäerte stäerken, ass d'Eropsetze vun der wöchentlecher Aarbechtszäit fir Studenten, déi elo vun

zéng op maximal 15 Stonnen d'Woch ebe geet. Domadder wäert eng laangjäreg Fuerderung vun de Studentenorganisatiounen ëmgəsət ginn. Fir vill Studenten, ech rappeléieren, ass et wichtig, während dem Studium schaffen ze goen, fir sech esou finanziell iwwer Waasser kënnen ze halen. Zéng Stonne sinn do zimlech wéineg, wat oft Studenten dozou bruecht huet, dass si ouni Kontrakt schaffen, dat mat alle Konsequenzen, déi dat mat sech bréngt.

Niewent der Concertatioun ad hoc mat de Servicer vum Ministère zur Iwwerpréifung vun den Anticumulbestëmmungen am Gesetz vun der Studentebourse wéinst dem Seuil vun de Revenuen, déi eben e Student därft hunn, hate mer an der Kommissioun nach weider Diskussiounen. Ee Punkt, deen och d'CSL an hirem Avis opgeworf huet, ass, ob e Student während deene maximum fënnef Joer, wou en därft schaffe goen, an d'Pensiounskeess muss abezuelen an ob d'Schaffstonden net nach weider erhéicht solle ginn. Dat géif allerdéngs eng ganz Partie aner Changementer mat sech bréngen an da wäre mer an engem aneren Zeenarion an net méi an deem vun engem Studentekontrakt.

Zum Volet vun der Stärkung vun de Rechter vun de Salariee gehéieren och nach d'Modifikatiounen am Fall vun enger Faillite betreffend d'Indemnité de préavis an d'Adaptatiounen bei der Opdeelung vum legale Congé, déi der aktueller Organisatioun vun der Aarbechtszäit domadder och wäerte besser Rechnung droen.

Am zweete Volet vum Projet de loi verbessere mer d'Effikassitéit vun de Beschäftigungsmesuren, andeems mer besonnesch d'Integratioun an den Aarbechtsmarché vun deene méi vulnerable Chômeure favorisieren, ugefaange mat der Ännerung bei der Aide au réemploi. Dat ass wuel dee Punkt, wou d'Fraktiounen sech alleguerten eens sinn, dass eppes muss änneren, mä awer och d'Meenunge ganz kloer ausereeneginn, wat sech dann hei soll änneren.

Als Éischt awer vläicht nach kuerz zur Erklärung, wat mat der Aide au réemploi iwwerhaupt gemengt ass. Hei spréngt den nationale Beschäftigungsfong an, wann ee Patron engem Chômeur en Job gëtt, wou en awer manner verdéngt wéi bei sengem viregten Job. De Sënn vun dëser Aide, déi ursprénglech agefouert ginn ass fir dat fréiert Personal an der Siderurgie, war et eben, d'Differenz tëschent der aler an der neier Pai auszegläichen. Déi genau Detailler vum Historique kënn Der dozou och a mengem schréffleche Rapport noliesen.

De Sënn vun der Aide au réemploi ass allerdéngs net, dass zum Beispill eng Persoun, déi vun der Bank kënn mat enger gewëssener Qualifikatioun a 7.000 Euro verdéngt huet, op där neier Plaz just fir de Mindestloun agestallt gëtt an de Stat dann d'Differenz därft bezuelen. Et ass näamlech esou, dass d'Salarieen op där neier Plaz oft just um Minimum bezuelt ginn an d'Aide au réemploi awer méi héich ass wéi de Mindestloun a munchmol souguer méi héich wéi déi nei Pai selwer.

Um Enn vun der Aide au réemploi, déi op véier Joer gelaf ass, souz de Salarie da mat enger extrem niddreger Pai do, déi senge Kompetenzen a senger Erfahrung am Endeffekt guer net Rechnung gedroen huet. D'Ausgangsiddi vun dëser Aide war an ass nach ëmmer gutt, mä mir musse leider unerkennen, dass mer eng pervers Entwécklung vun enger Paiեսubventioun hunn, déi de System eigentlech absurd mécht.

Dat muss sech eben änneren. An dofir gouf och schonn den 28. November 2014 am Accord tëschent der Regierung an de Gewerkschaften de Prinzip vun dësen Ännerunge festgehalten.

Déi nei Regelung gesäit elo vir, dass e Patron méi realistesch Salairë bezuele soll. Dat heescht, déi nei Pai an d'Aide au réemploi mussen zesummen 90% vun der aler Pai ausmaache respektiv de Maximum, deen no Applikatioun vum Plaffong vun 3,5-mol dem Mindestloun erauskënn. Dobäi dierf d'Aide au réemploi net méi wéi 50% vun der neier Pai ausmaachen. Och bei der Konditioun, fir dës Aide iwwerhaupt ze kréien, sinn nei Bedéngunge virgesinn, fir verschidde Mëssbräich esou ze evitéieren. Mat der Konditioun, dass de Salarie während iwwer 24 Méint ee CDI muss gehat hunn, fir an de Genoss vun esou enger Aide ze kommen, war de Statsrot net averstanen an huet eng Opposition formelle dropgesat. Well dat géif näamlech géint den Egalitéitsprinzip goen an de Statsrot gesäit hei och keng Noutwendegkeet vun engem CDI vir.

Dës Konditioun gouf fale gelooss, esou dass e Salarie am Kader vun engem Aarbechtskontrakt vu 24 Méint muss geschaff hunn, wann hien d'Entreprise verléisst, fir kënnen vun enger Aide au réemploi ze profitéieren. Elo ginn haapt-

sächlech Leit iwwer 45 Joer viséiert an déi, déi duerch kollektiv Kënnegung, Faillite oder duerch e Plan de maintien dans l'emploi eng nei Aarbechtsplaz sichen. Och wëll ech nach gären drop hiweisen, dass fir d'Aide au réemploi elo eng legal Basis geschafe gëtt, well déi bis haut ëmmer iwwer Règlement-grand-du-calle geregelt war.

Weider suerge mer mat dësem Projet de loi fir Verbesserung fir d'Demandeurs d'emploi, déi sech wëlle selbststänneg maachen. Aktuell ass et esou, dass e Chômeur säi Chômagegeld gestrach kritt, soubal e sech als Independant verséichert. D'Verbesserung besteet elo doranner, dass en Demandeur d'emploi, dee sech ebe wëllt selbststänneg maachen, dee sech nei orientéiert an eben eng eegen Entreprise wëllt grënnen oder eng existéierend Entreprise wëllt iwwerhuelen, dass dee weiderhi ka Chômagegeld bezéien.

Sënn mécht et och, dass déi betraffe Persoun fir dës Period, maximum sechs Méint, an Zukunft dovunner befreit wäert ginn, dass se sech bei d'ADEM muss virstelle goen an och deemno muss en Emploi approprié akzeptéieren.

Den Emploi approprié ass dann dat nächst Stéchwuert hei am Projet de loi. Dës Notioun wäerte mer elo och dann an de Code du travail verankeren. Kuerz zur Erënnung: Et ginn am Ganze siwe verschidde Kritären, déi den Emploi approprié definéieren. Et sinn dat den Niveau vun der Remuneration, eventuell zesumme mat der Aide au réemploi, déi professionell Fäegkeet an déi psychesch wéi och déi physesch. Den deeglechen Trajet, d'Familljesituatioun, de Regime de travail, d'Astellungsver-sprechen an d'Aarbechtskonditiounen.

Dës ware bis elo iwwer Règlement grand-ducal geregelt. Si bleiwen och déiselwecht. Et mécht awer Sënn, dës elo an d'Aarbechtsrecht niderzeschreiwene, well dës limitéiert Opzielung schützt virun allem d'Chômeure virun der Willkür vun der ADEM, där et net erlaabt ass, nach zousätzlech Kritäre bäizesetzen. Oder fir et méi einfach ze formuléieren: Hei wäerte mer an Zukunft och fir méi Transparenz suergen.

Kleng Adaptatiounen sinn dann nach bei de Mesurë fir jonk Chômeure virgesinn. Zum Beispill fir e Contrat d'initiation à l'emploi kënnen ze kréien, gëtt elo d'Konditioun bäigesat, dass e Jonken ënner 30 Joer mindestens dräi Méint bei der ADEM muss ageschriwwen sinn. Also dräi Méint dierf dee kenger Aarbecht nogoen, fir kënnen vun dësem Kontrakt ze profitéieren.

Weider wäerte mer och eng Aide à la formation aféieren, déi allen Demandeurs d'emploi zousteet, déi regelméisseg u Formatiounen wäerten deelhuele, awer kee Chômagegeld kréien. Heimadder verbessere mer sécherlech d'Situatioun vun all deene Jonken, déi op der Sich no enger Aarbecht sinn, eben eng Formatioun maachen, fir kënnen esou besser an den Aarbechtsmarché integréiert ze ginn, an awer iwwer keng eege Ressourcë verfügen.

Iwwer Amendement wollt d'Kommissioun aféieren, dass dës Indemnitéit vu Steieren a soziale Cotisatiounen befreit soll ginn. Dat war gutt gemengt, mä de Statsrot huet hei erëm eng Opposition formelle dropgesat, wat d'Steierfräiheet vu verschiddene Supplément betrëfft. Och dëst géif hei géint de Gläichheitsprinzip verstoussen, soudass mer déi eigentlech gutt gemengten Initiativ erëm fale gelooss hunn.

En drëtte Volet vun dësem Projet de loi viséiert eben eng besser Connaissance iwwert d'Evolutioun vum Aarbechtsmarché, fir esou eng méi zilgerichte Politik ze maachen. De RETEL, de Réseau d'étude sur le marché du travail et de l'emploi, kritt eng legal Basis. Dee fonctionnéiert jo schonn aktuell op Base ad hoc, ersetzt awer domadder den Observatoire national du travail et de l'emploi. D'Notze vu Statistiken, Analysen an Etüden erlaabt eis et esou, eng méi cibléiert Politik an dësem Beräich ze maachen.

Zum Echange an der Interkonnexioun vun den Données gouf et och hei vum Conseil d'État eng Opposition formelle. Déi konnte mer awer behiewen, andeems mer hei vereenzelt Punkte präziséiert hunn an hire Bedenken domadder konnte Rechnung droen.

Här President, dëst zu de wichtigste Change-menter, déi mer mat dësem Gesetz maachen, ebe fir e bessere Schutz fir d'Rechter vun de Leit, déi schaffen, a fir eng besser Integratioun vun de Chômeuren an den Aarbechtsmarché. Alles wichtig Aufgaben, déi mer als Politiker ze bewältegen hunn. An dofir hoffen ech hei op eng breet Zoustëmmung zu dësem Projet de loi, zu dëse Gesetzesännerungen a ginn domadder natierlech dann och den Accord vun der sozialistischer Fraktioun a soen nach jidder-engem Merci, dee mer gehollef huet, fir dës Rapport da kënnen ze schreiwene.

Merci.

► **Plusieurs voix**.- Très bien!

► **M. Mars Di Bartolomeo**, *Président*.- Merci och der Madamm Rapportrice. Eischten ageschriwwene Riedner ass den Här Marc Spautz. Dir hutt d'Wuert, Här Spautz.

Discussion générale

► **M. Marc Spautz** (CSV).- Här President, léif Kolleeginnen a Kolleegen, fir d'Éischt e grouse Merci un d'Rapportrice, d'Madamm Bofferding, fir hiren ausféierlechen an detailléierte Bericht. An ech wëll och Merci soe fir déi konstruktiv Diskussioun, och wa mer eis net an alle Punkten ëmmer eens waren, esou war et dach awer konstruktiv an och ganz interessant, déi Debatten an deenen eenzelne Voleten ze féieren.

Ech mengen, dee Volet vun de Studenten, dat ass eppes, wat mir als CSV ausdrécklech begreissen. Dat ass och de Fall bei den anere Geschichte mat der Lounfortzahlung a mat der Faute grave. Wou mir e bësse méi Problemer haten - soe mer, Problemer ass och e schlecht Wuert, well mer eis selbstverständlech nach un eis Engagement vum 2012 kënnen erënnere, wou mer schonn 2012 gesot hunn an der viregter Koalitioun, dass een dat mam Reemploi eng Kéier misst iwwerkucken, well mer do festgestallt hunn, dass do heiansdo dat Ganzt aus dem Rudder gelaf ass. D'Madamm Bofferding hat an deem Zesummenhang och scho verschidde Modeller genannt. Dofir war et fir eis selbstverständlech, dass een do iwwert dee ganze Punkt géif diskutéieren an dass een do och géif driwwer nodenken, fir aner Weeër ze fannen.

Dat war schonn esou 2012. Duerno ass dat nach eng Kéier ofgemaach ginn, den 28. November 2014 sinn Accorde fonnt ginn tëschent der Regierung an den nationalen, representative Gewerkschaften, wou dat do och e Bestanddeel dovu war. Et war zwar net e fäerdege Package dran, mä et ass festgehalen ginn, dass ee géif kucken, fir nei Weeër ze fanne wat d'Aide au réemploi, d'Prétraite partielle an esou weider géif ubelaangen.

Wa mer scho bei deem Accord sinn, erlaabt mer ze bemerken, och wann den Här Minister dofir net zoustänneg ass, do si jo verschidde Saache schonn ëmgəsət ginn, verschidde Saachen nach net. An eppes, wat eis wirklech e bësse ënnert de Fanger brennt, dat ass dat mat den Allocations familiales, well do läit säit dem 27. Oktober 2016 den Avis vum Statsrot vir, mä et ass awer nach ëmmer näischt geschitt.

Här President, ech hat eng Question parlementaire gestallt. Dir hat se refuséiert, well am Règlement steet: Et därft ee keng Question parlementaire stellen zu enger Prozedur, wou d'Gesetz am Lafen ass. Mä wat ech net verstinn: De 27. Oktober 2016 koom den Avis vum Statsrot. Entweder soll ee soen, et stëmmt een dat Gesetz, oder et soll ee soen, mir zéien et zréck. Mä et soll een awer net weiderfuere. Do erëm d'Klammer zou. Och dat war e Bestanddeel vum Accord vum 28. November 2014.

Beim Reemploi ass d'Madamm Bofferding agaangen op déi Positioun an déi Proposition, déi gemaach gi war an der Kommissioun vum Minister, déi och zréckbehalte ginn ass. Mir hatten eng aner op den Dësch geluecht, wou dat e bësse méi mam Alter gestaffelt war, wou mer gesot hunn, mir hätten eis och kënnen virstellen, dass dat altersméisseg gestaffelt wär. Dass een do hätt kënnen méi laang fuere, dem Alter no. Dofir hu mer och - den Här President ass haut entschëllegt - bei verschiddenen Amendementen net dergéint gestëmmt, mä mir hunn eis enthalen, well mer eis do awer och aner Moosnamen hätte kënnen virstellen, wéi een d'Aide au réemploi hätt kënnen organisieren.

Mir sinn awer elo an der Zwëschenzäit der Meenung, dass mir och dësem Gesetz hei kënnen d'Zoustëmmung ginn. Och wa mer nach wie vor der Meenung sinn, dass een de Reemploi och hätt kënnen aneschtters staffelen, näamlech dem Alter no, andeems ee gesot hätt, deemno wat fir een Alter een huet, hätt een da kéinte méi laang oder manner laang vun där Staffelung profitéieren.

Mä et ass awer wichtig, dass een och no bausen dee Message gëtt, dass d'Aide au réemploi awer och net dofir do ass - an d'Madamm Bofferding huet verschidde Beispiller erkläert -, dass do kéint Profitt dermat gemaach ginn. Dass Leit während véier Joer op de Mindestloun bezuelt gi vum Patron, si kréien de Complement vum Stat a wann déi véier Joer ëm sinn, da war keng Plaz méi oder et sinn aner Problemer am Btrib gewiescht. Dat war jo och eppes, wat mer 2012 schonn opgefouert hunn, an dofir wäerte mer dem Gesetz och d'Zoustëmmung ginn.

Ech wëll awer och soen, dass et wichtig ass, an dat hunn zwee Arrête vun der Cour constitu-



Chambre des Députés

Compte rendu officiel

Supplément commun aux quotidiens:

Luxemburger Wort, Tageblatt, Lëtzebuerger Journal, Zeitung vum Lëtzebuerger Vollek

Contenu rédactionnel:

Service du compte rendu de la Chambre des Députés
Service des relations publiques de la Chambre des Députés
Tél. 466 966-1

Conception, saisie de texte et mise en page:

Polygraphic SA, Esch-sur-Alzette

Concept et coordination générale:

BRAIN & MORE, agence en communication, Luxembourg

Imprimeries:

Saint-Paul Luxembourg SA 2, rue Christophe Plantin L-2988 Luxembourg
Editpress SA 44, rue du Canal L-4050 Esch-sur-Alzette

tionnelle mat sech bruecht, déi d'lescht Woch respektiv viru 14 Deeg geholl gi sinn - zu deene meng Kollege Laurent Mosar a Gilles Roth och schonn eng Question parlementaire gestallt hunn -, wou näamlech verschidde Saachen a Fro gestallt gi sinn, well Saachen am Reglement stoungen an net am Gesetz.

Wa mir dat Gesetz haut stëmmen, ass dee Problem geléist a mir sinn domadder fir d'Zukunft deem ganze Punkt och nokomm, well mer et elo an d'Gesetz aschreiwen. An dat ass och ee vun deene Punkten, firwat mer gesot hunn, dass mer deem Gesetz hei wäerten eis Zoustëmmung ginn.

Netdestotrotz, Här Minister - ech hat elo virun dat Beispill gi vun der Prestation familiale -, géif et eis awer och interesséieren: Wat den Accord vum 28. November 2014 ubelaangt, do sinn awer och nach aner Projeten, déi scho laang missten oder sollten do sinn, wou Dir - an och aner Kollege vun lech - amgaange sidd, Verhandlungen ze féieren. Do geet et ëm d'Prétraite partielle, do geet et ëm d'Regelung vun den 52 an 104 Wochen.

(Interruption par M. Nicolas Schmit)

Dir kënn jo herno op all déi Punkten agoen. Et geet ëm de Reklassement, et geet ëm d'Diskussion vum Congé linguistique an et geet ëm d'Gesetz vum Harcèlement moral. An et géif eis awer dann trotzdem interesséieren, wéi et géif viruoen, wou ee mat all deene Projeten, déi jo deeselwechten Dag d'Zoustëmmung fonnt hunn tëschent de Gewerkschaften an der Regierung, drun ass.

Wéi ee vun deene Projeten nach d'Chance huet, ze kommen, a bei wéi engem et dann och méiglech ass - dat leeft säit November 2014! -, dass mer et dann awer véier Joer duerno géife fäerdegbréngen, dass déi Accorden, déi deemools fonnt gi sinn, awer och kéinten ëmgusat ginn oder op alle Fall an d'Prozedur kommen, fir dass och do aner Diskussioune kënne gefouert ginn. Wéi geet et do virun?

Ech weess, dass do Verhandlungen am CPTe lafen. Ech weess, dass do och bilatéral Verhandlungen lafen tëschent der Regierung an de Patrone respektiv der Regierung an de Gewerkschaften. Mä et wier wichteg, dass mer och an deenen Dossiere géife Léisunge fannen. Ech weess, Här Minister, dat sinn net nëmmen Dossieren, déi lech uginn, mä och Är Confrères, de Sozialminister respektiv d'Familljeministes. Mä et wier och fir eis wichteg, dass mer net nëmmen an deem Problem eng Léisung oder eng Deelléisung fannen, well et jo ëmmer muss méiglech sinn, eng Kéier dat Ganzt ze adaptéieren. Wa mer feststellen, dass dat beim Reemploi och nach net definitiv de gëllene Wee war an dass een och nach aner Moyene ka fannen, dass mer dann op de Wee ginn, fir kënnen ze kucken, dann och déi Adaptatiounen ze maachen.

An dann hoffen ech, dass net nëmmen deen heite Projet, dee festgehalte gi war, an der Chamber duerchkënn, mä dass mer och nach déi aner Projeten op den Ordre du jour kréien, fir déi en connaissance de cause kënnen ze maachen, an dat och am Hibleck a konform mam Accord, deen Der am November 2014 mat de Gewerkschafte fonnt hat.

Villmools Merci.

► **Plusieurs voix.** - Très bien!

► **M. Mars Di Bartolomeo, Président.** - Merci och dem Här Spautz. An nächsten ageschriwwene Riedner ass den Här André Bauler.

► **M. André Bauler (DP).** - Här President, wann een als Student eng Aarbecht fir d'Uni schreift oder eng Presentatioun hält, kritt een dacks gesot, datt ee probéiere soll, fir d'Quint-

essenz vun deem ze behandelnde Sujet esou kuerz wéi méiglech ze formuléieren, am beschte souguer just an engem Saz, soudatt jiddereen direkt weess - Gesondheet, Madamm Dall'Agnol -, ëm wat et geet.

Wann ech elo d'Quintessenz vun deem Projet de loi soll an engem Saz resuméieren, da fällt dat net ganz einfach, well mir haut iwwer eng Partie zum Deel dach ganz ënnerschiddlech aarbechtspolitesch Mesuren ofstëmmen. Ech wëll dofir emol direkt der Rapportrice, der Madamm Taina Bofferding, Merci soe fir hiren ausféierleche schrëftlechen a mündleche Rapport. Et gouf kee wichtige Detail vergiess an dofir wëll ech elo och net méi op all eenzelne Punkt agoen a just e puer Bemerkunge maachen, déi eis als Demokratesch Partei wichteg sinn.

Här President, ech bleiwen direkt bei de Studenten. Déi dierfe mam Akraafttriede vun deem Gesetz an Zukunft méi Stonnen nieft hirem Studium schaffe goen. Déi maximal Stonnen, et ass gesot ginn, déi si elo ausserhalb vun de Schoulvakanzen am Kader vun engem CDD kënne schaffen, gi vun zéng op 15 Stonne gehéicht. Mir kommen heimat enger ausdrécklecher Fuerderung vu ville Studenten no, déi sech entweder en Täschegeld wëlle verdéngen oder méi onofhängeg nach vun hiren Eltere wëlle ginn a just mat hirer Bourse an hirem Niewenjob hire Studium wëlle finanzéieren.

Mir begrëssen als Demokratesch Partei dës Upassung ausdrécklech am Interessi vun deene jonke Leit, déi dacks de Weekend an owes bereet sinn, op Plazen anzesprangen, wann aner Leit raschte wëllen oder Momenter mat hirer Famill wëlle verbréngen.

Eng zweet wichteg Ännerung, déi dës Projet de loi proposéiert, betrëfft déi sougenannten Aide au réemploi. Dës Hëllef fir Leit, déi an de Chômage gefall sinn an op enger neier Plaz eventuell zolidd Gehaltsaboussen hu missen hinuolen, soll net a Fro gestallt ginn. Allerdéngs huet den aktuelle System leider jorelaang zu Mëssbräich gefouert.

Et kount deelweis zu regelrechte Konstrukter mat Firmegrënnungen - d'Rapportrice huet dat och an hirem Rapport relevéiert -, fir datt Leit mat alt bis zu 10.000 Euro Salaire hir fréier Pai konnten 48 Méint bäibehalen. Do ware sécherlech eng Rëtsch Fäll drënner, wou et ouni Zweifel och ouni Aide au réemploi gaange wier.

Ausdrécklech hat d'Commission du Travail et de l'Emploi et scho viru Joren am Kader vun der Virbereedung vun eise groussen Débat d'orientation iwwert d'Beschäftigungspolitik begrëisst, dass d'Aide au réemploi soll reforméiert ginn. Dës Moosnam ass jo am Laf vun de Joren éischter zu enger verstoppter Subvention mutéiert an hat, wéi eise Rechnungshaff, d'Cour des comptes, dat virun etleche Joren an hirem Spezialrapport festgehalen hat, grouss Potenzial fir Mëssbräich.

Am Rapport vun der Petitiounskommission am Kontext vum Débat d'orientation iwwert den Aktivitéitsrapport vum Ombudsmann iwwert d'Joer 2010-2011 stoung scho Folgendes zum Thema ze liesen. Ech zitieren: «La Commission du Travail et de l'Emploi rappelle que l'aide au réemploi a été créée dans l'intérêt du salarié et est précisément destinée à faciliter un nouvel engagement à la suite d'un licenciement pour motifs économiques. Il n'est dès lors pas acceptable que l'employeur embauchant le salarié bénéficiaire de l'aide au réemploi conçoive en fait cette dernière comme subvention dans son propre intérêt et rémunère de ce fait le salarié à un niveau ne correspondant ni à sa qualification ni à la rémunération qui devrait lui revenir dans la grille de salaires normale applicable dans son entreprise.»

D'Commission du Travail et de l'Emploi huet deemools, also 2012, schonn d'Meenung gedeelt, datt den Aarbechtsminister dës Praxis endlech en Enn soll setzen an datt d'Bedingungen, fir an de Genoss vun dëser Hëllef, also der Aide au réemploi ze kommen, misste redefiniert ginn, fir datt dës Instrument vun der Beschäftigungspolitik seng ursprénglech Raison d'être soll fannen.

An zum Thema Aide au réemploi stoung am Rapport vun eise Rechnungshaff ze liesen: «...la cour constate qu'au fil des années, la mesure a conduit à certaines dérives...». Esou huet d'Cour des comptes festgestallt, dass a munche Fäll d'Aide au réemploi méi héich war - an d'Rapportrice huet dat och nach eng Kéier widderholl - wéi de Salaire, dee vum Patron réellement ausbezult ginn ass.

D'Cour des comptes kount an hirem Spezialrapport zur Schlussfolgerung: «En effet, selon la cour, il s'avère important de pouvoir évaluer une mesure au bout d'un certain temps afin d'apporter des corrections nécessaires ou de l'abandonner tout simplement si elle n'a pas apporté les résultats escomptés.»

An eise Rechnungshaff hat deemools gefuerdert, dass d'ADEM sech e Bewäertungssystem vun deene verschiddene Mesurë gëtt. Elo, siwe Joer méi spët, huele mer dat am Kontext Aide au réemploi mat eppes Verspéidung no. Mä besser elo, wéi wa mer et net géife maachen.

D'Rapportrice Taina Bofferding schreift dann och zu Recht an hirem Bericht, datt d'Aide au réemploi, ech zitieren: «...a été dans de nombreux cas détournée de ses fins initiales pour prendre la forme d'une subvention de salaire. Surtout en ce qui concerne les demandeurs d'emploi qualifiés et bien rémunérés, l'aide au réemploi versée mensuellement dépasse souvent le niveau du salaire social minimum, voire le niveau du nouveau salaire payé par l'employeur.»

Ech wëll awer hei an haut ausdrécklech déi Lëtzebuerger Betriber luwen, déi sech dës Praxis net verschiwwen hunn, déi also direkt e fairen an ugepasste Loun bezuelt hunn. Et soll an et dierf een dës Betriber net mat deenen an een Dëppe geheien, déi systematesch op d'Aide au réemploi zrëckgegraff hunn, fir hir Käschten op Käschte vun der Allgemengheet, spréch dem Statsbeidel, ze reduzéieren.

Här President, mir begrëssen och d'Aféierung vun enger Aide à la formation, fir all Chômeur, dee keng Indemnitéit kritt, finanziell ze hëlfen, wann dësen un enger Weiterbildung deelhält. Hei geet et jo drëms, alles ze ënnerhuelen, fir d'Employabilitéit vu Leit ouni Aarbecht ze stäerken. Dat ass fir d'DP den absolut richtige Wee a fënnt evidenterweis eis Ennerstëtzung.

An deem Kontext si mer och als Demokratesch Partei zefridden, dass d'ëffentlech Hand an Zukunft och d'Méiglecheit wäert ënnerstëtzen, fir d'Demandeurs d'emploi an d'Situatioun ze bréngen, wou si e klenge Betrib kéinten iwwerhuelen, a während der Virbereedungszeit souwuel hir Indemnitéit weider ausbezult kréie wéi och net obligéiert gezwonge sinn, all Emploi approprié, wéi d'ADEM dat virschreift, mussen unzuhuelen.

D'DP ënnerstëtzt all Reflex, all Initiativ, fir Leit an d'Selbststännegkeet ze bréngen a fir d'Selbststännegkeet fit ze maachen. Si huet grouss Respekt virun deene Leit, déi mat hirem Wëllen an hiren Kreativitéit derfir surgen, datt net nëmme si, mä och aner Leit eng Aarbecht fannen.

D'Zil vun all Aarbechtsmaartpolitik an all wirtschaftspolitesche Beméiunge muss d'Stärkung vum éischten Aarbechtsmaart sinn. Beschäftigungsinitiative bidden eng Plaz, wou forméiert an encadréiert soll ginn. Den éischten Aarbechtsmaart schafft dogéint déi Aarbechtsplazen, déi sech all Dag an der fräier Maartwirtschaft behaapte mussen an déi net géifen entstoën, wann et net ëmmer nees couragéiert Mënsche géif ginn, déi de Risiko oder d'Erausforderung vun der Indépendance, der wirtschaftlecher Selbststännegkeet op sech huelen.

Mir fannen et des Weideren och richtig, dass mir dem RETEL endlech eng gesetzlech Basis ginn, déi dës verdéngt, well et ass wichteg, dass mer eng Plattform hunn, déi et erlaabt, fir Entwécklungen um Aarbechtsmaart ze suivéieren an d'Aarbechtsmaartpolitik zu gegebener Zeit en temps utile ze ajustéieren. Ouni esou en Instrument kann een haut net méi déi Analysen duerchféieren, déi ee brauch, fir en âme et conscience, géif ech soen, ze handelen.

Här President, all d'Moosnamen, iwwert déi mer haut schwätzen, goufen op déi eng oder aner Manéier mat de Sozialpartner diskutéiert. Wéi et esou dacks geet, ass net jiddwereen zu honnert Prozent mat allem zefridden, wat mir haut entscheeden a stëmme wäerten. Ouni elo wëllen op déi eenzel Kriticken anzegoen, déi

entweder d'Patronat oder d'Gewerkschaften zu deem engen oder anere Punkt ervirbruecht hunn, wëll ech awer widderhuelen, wat mir als DP zu villen aarbechtsmaartpolitesche Projete soen. Mir mussen ëmmer am A behalen, wat fir Auswirkungen, Konsequenzen eis Gesetzter um Terrain hunn, an eis froen: Ginn d'Objektiver erfëllt, déi mer eis gesat hunn?

Profitéieren d'Leit vun de Moosnamen? Falls dat net de Fall wier, u wat géif et da leien? Hunn d'Akteuren administrativ Problemer, fir dës Moosnamen ëmzesetzen? Ginn et eventuell och Auswirkungen um Terrain oder Mëssbräich, déi esou net vum Gesetzgeber, also vun eis, vum Parlament, gewollt waren?

Et ass also vun eiser Säit aus den Appell un déi Verantwortlech, fir e regelméisseg Bilan iwwert den Erfolg vun de Moosnamen och vun deem Gesetzesprojet opzestellen, eventuell Upassunge virzehuelen, wann eppes net esou funktionéiert, wéi dat awer am Ufank ugeduecht war.

Här President, wann ech dann elo zum Schluss awer soll dës Gesetzesprojet an engem Saz resuméieren, da wëll ech soen, dass all dës Moosnamen, iwwert déi mer elo de Mëtteg schwätzen a geschwat hunn, eist Aarbechtsrecht op d'mannst um Pabeier méi gerecht a méi wirksam solle maachen. D'Auswirkungen an der Praxis wäerte mer da genee verfolge mussen.

Ofschléissend ginn ech am Numm vun der DP-Fraktioun den Accord fir dës Gesetzesprojet a soen lech Merci fir Är Gedold an Äert attentiivt Nolauschteren.

► **Plusieurs voix.** - Très bien!

► **M. Mars Di Bartolomeo, Président.** - Merci och lech. Nächst ageschriwwene Riednerin ass, wann ech dat hei richtig gesinn, d'Madamm Viviane Loschetter.

► **Mme Viviane Loschetter (déi gréng).** - Merci, Här President. Ech wëll net am Numm vu mengem Kolleg Gérard Anzia schwätzen, deen haut net kann hei sinn. Hien huet an der Chamberskommission jo mat un deem Projet geschafft.

Der Rapportrice wëll ech Merci soen. Ech mengen, si huet déi verschidde Punkten, déi do an deem Projet de loi do erëmzefanne sinn, gutt explizéiert. Mir géife gärën als gréng Fraktioun just nach e grouse Merci ausdrécken un all déi, déi bedeelegt waren un deene verschiddearteneg Negociatiounen. Dat ware Gespréicher, déi net ëmmer einfach waren, wou een natierlech ni zu honnert Prozent e Konsens fënnt. Mä mir begrëisse wierklech ausdrécklech d'Resultat, wat dobäi erauskomm ass, an déi Verbesserungen, déi mer awer musse feststellen, an déi Verbesserung, déi mer an deem Projet de loi erëmfannen, an dofir och d'Zoustëmmung vun der grénger Fraktioun zu deem Projet.

► **M. Mars Di Bartolomeo, Président.** - Merci. D'Wuert huet elo den Här Gibéryen.

► **M. Gast Gibéryen (ADR).** - Merci, Här President. Léif Kolleeginnen a Kolleegen, och vun eiser Säit aus wëll ech Merci der Kolleegin Taina Bofferding soe fir hire gudd schrëftlechen an och mündleche Bericht, wou se wierklech alles am Detail gutt erkläert huet.

An dëser Legislaturperiod, Här President, hu mer schonn eng Rei vu Gesetzter gestëmmt, déi den Droit du travail, déi awer och virun allem eng Rei vu Bestëmmungen, wat d'ADEM ubelaangt huet, nei geregelt hunn. Mir hunn als ADR praktesch alleguer déi Gesetzter matgestëmmt.

Virun allem bei deem, wat de Chômage ubelaangt, wësse mer, datt et kee Patentrezept gëtt, wou ee ka per Gesetz decidéieren, wéi een de Chômage géif erofsetzen. Mä et gëtt eng ganz Rei vu Moosnamen, déi heiansdo nëmme punktuell wirken, wou nëmmen e puer Leit dovou betraff ginn, mä, an ech hunn dat schonn op dës Plaz gesot, all Moosnam, egal op wéi weineg Leit se och zoutrëfft, ass wichteg, well mer doduerch de Chômage erofkréien a Leit an den éischten Aarbechtsmaart oder a Beschäftigungsinitiativen, wat jo och de Fall ass, kréien. Mä eist Zil muss et sinn, d'Leit alleguer an den éischten Aarbechtsmaart eranzekréien.

Dat heite Gesetz gesi mer aus deemselwechte Bléckwénkel. Et sinn zwar net nëmmen an deem Gesetz Moosnamen, déi d'Chômeuren ubelaangen, mä et sinn och Moosnamen, déi d'Aarbechtsrecht betreffen; et si Moosname fir Leit, déi krank ginn, mat dra virgesinn.



An dofir, mengen ech, kann een all d'Bestëmmungen, déi an deemem Gesetz sinn, unisono vun eiser Säit aus guttheeschen. An dofir ass et och kloer, datt mir wäerten dëst Gesetz stëmmen.

Mä, ech mengen, mir waren eis alleguerten eens - ech huele just e puer Punkten eraus, op déi ech wëll agoen -: Bei der Lohnfortzahlung, dem Krankengeld, wéi mir et hei zu Lëtzebuerg an der Regel nennen, sinn et eng Rei vu Betriber ginn, déi an de Kollektivverträge intern schonn och Bestëmmungen haten, wéi d'Krankengeld bei hinne géif berechent ginn.

Mir wëssen awer, datt dat ëmmer zu Konfusioun gefouert huet. An duerfir, mengen ech, ass dat heite Gesetz an deem Sënn äusserst positiv, well et eben elo ganz kloer festleet, wéi d'Krankengeld geregelt gëtt, an et mécht am Prinzip dräi Kategorien, mä zwou wesentlecher, dat ass, et seet am Fong: An deene Betriber, wou den Aarbechtsplang festlouch, ier ee krank ginn ass, gëtt bezuelt, esou wéi den Aarbechtsplang dat virgesinn huet. Wann also do Sonndesaarbecht, Nuetsaarbecht oder eppes ageplangt war, gëtt dat bezuelt.

An an deene Betriber, wou keen Aarbechtsplang festlouch, ier dee Betreffende krank ginn ass, do gëtt einfach d'Moyenne geholl vun deene leschte sechs Méint. Ech fannen dat eng gutt Regelung, wou keen Abus ka gemaach ginn a wou, mengen ech, awer jiddweree kann zu sengem Recht kommen. D'Gesetz leet also an enger ëmstriddener Fro, déi an der Vergaangenheet vill zu Diskussiounen an zu Prozesser gefouert huet, hei kloer Bestëmmunge fest.

Datt d'Studenten och elo kënnen niewent hirem Studium tëschent zéng a 15 Stonnen d'Woch schaffen, wat jo och eng Fuerderung vun de Studentenorganisatiounen ass, begrësse mer och, obschonn een hei muss un eppes awer denken, ob et net méi richtig wier, datt am Fong all Student kéint seng Studie maachen, ouni datt e misst doniewent schaffe goen, fir seng Studien ze finanzéieren. Well d'Studie si jo esou ausgerechent, datt een esou vill Stonne soll studéieren, an dat anert ass, fir eben doniewent ze schaffen, fir seng Studie kënnen uerdentlech duerchezéien.

A wa mer awer elo Studenten hunn, déi am Fong musse schaffe goen, fir hir Studien ze finanzéieren, hu se am Fong net déi fräi Zäit, wou ee kéint soen, déi se bräichten, fir hir Studien uerdentlech ze maachen. Sécherlech hu mer hei zu Lëtzebuerg eng ganz Rei vu Moossnamen an Ënnerstëtzungen, déi de Studenten hëllefen, fir kënnen iwwert de Wee vun de Bourssen hir Studien ze finanzéieren. Mä op där anerer Säit wësse mer och, datt vill anerer heihinnerkommen, déi déi Méiglechkeeten net hunn.

Mir si mat där Moossnam och averstanen, mä mir ginn awer ze bedenken, datt et am Fong traureg ass, datt Studente musse schaffe goen niewelaanscht, fir hir Studie kënnen ze finanzéieren. Et ass e Wunsch vun de Studenten, fir dat kënnen ze maachen. Mä insgesamt, mengen ech, wier et besser, wa se dat och kéinten anescht maachen.

Et kann een natierlech soen: Déi maachen dat gären, si maachen en Zousaz. Hei ass jo elo nach d'Vakanzenaarbecht net matberücksichtigt. Et kann een och nach an der Vakanz schaffe goen. Mä insgesamt, mengen ech, sollt een awer dat méi kritisches kucken. Mä mir sinn awer domat averstanen.

Ee weidere Punkt, deen de Mëtten hei ganz vill diskutéiert ginn ass, dat ass d'Aide au réemploi. Ech mengen, mir sinn eis heibannen eens, datt an der Vergaangenheet mat der aktueller Bestëmmung e gewëssenen Abus do entstanen ass. Et war am Fong deelweis eng Subventioun u Betriber fir e gewëssene Mëssbrauch, deen net am Sënn vun dem geduechtene Gesetz war, andeem datt se higange sinn, hir Leit minimal bezuelt hunn, an de Stat huet iwwert de Wee vun der Aide au réemploi am Fong e groussen Deel da bei dat Gehalt bäigeluucht, fir datt déi Leit eben op déi 90% vum leschte Gehalt komm sinn.

Dat war net de Gedanken, deen deemools am Gesetz war. Wann dat haut korrigéiert gëtt, dann ass dat richtig. Ech mengen, meng Virriedner hu gesot, datt déi Bestëmmung hei zwou wesentlech Saachen huet. Et ass net nëmmen, datt mer keen Abus méi oder den Abus net méi kann ze grouss sinn, well eben elo och déi 90% bestoe bleiwen, mä datt den Zouschoss, deen de Stat derbäigëtt, net méi wéi 50% ka si vun deem, wat de Betrib selwer bezilt. A well eben awer festgehale gëtt, datt et mussen 90% sinn, muss de Betrib ebe säin Deel unhéien, fir un déi 90% erunzekommen.

Mir kréien also deen Abus ausgeraimt, an op där anerer Säit ass et awer och fir de Salarié wichteg, datt e vun Ufank u méi en héicht Gehalt huet. Well wann en theoretesch just um Mindestloun bezuelt gëtt an de Gros vu sengem Gehalt besteet aus enger Subventioun, an déi fällt no véier Joer ewech, da steet dee Salarié am Fong do mat engem Gehalt vum Mindestloun, wat eng grouss Differenz ass vis-à-vis vun deenen 90%, déi e virdru kritt huet. An duerch des Bestëmmung gëtt am Fong seng Aarbecht, seng Qualifikatioun, seng Responsabilitéit vun Ufank u vum Betrib och méi héich ageschätzt a bewäert duerch de System. An duerfir ass dat heiten och eng gutt Regelung.

Ech ginn dervun aus, Här Minister, Här President, datt déi Bestëmmung hei sech nëmmen op nei Verträge auswirkt an datt déi aktuell Verträge wäerten auslafen.

Déi aner Moossnamen, sief dat den Emploi approprié, sief dat ee Chômeur, dee wëllt e Betrib iwwerhuelen oder nei grënnen, oder all déi aner Moossnamen, op déi wëll ech net weider agoen, si si gutt hei vu menge Virriedner erkläert ginn. Alleguer déi Moossname fanne mir positiv, wéi gesot, souwéi och dat ganzt Gesetz.

Duerfir bréngen ech och d'Zoustëmmung vun der ADR zu deemem Gesetz.

► **M. Fernand Kartheiser** (ADR).- Très bien!

► **M. Mars Di Bartolomeo**, *Président*.- Merci. Leschten agedroene Riedner ass den Här Marc Baum.

► **M. Marc Baum** (*déi Lénk*).- Merci, Här President. Wann een dee Projet hei liest, dann huet ee ganz staark den Androck, et huet een et e bësse mat engem Fléckenteppech ze dinn. Et ginn näamlech op deenen ënnerschiddlechste Plazen am Code du travail Ännerungen an Ergänzung virgehoen, emol zum Gudden, emol awer och, wéi mir mengen, zum manner Gudden oder zumindest zum Problemateschen.

Mä ech mengen, datt et ganz schwéier ass, an den Här Bauler huet dat virdrun och scho gesot, d'Kärphilosophie an engem Saz ze resuméieren oder d'Quintessenz wierklech op de Punkt zréckzeféieren.

An, ech mengen, datt dat huet och domadder ze dinn, datt an deenen iwwer 30 Artikelen a Paragraphen vum Gesetz déi Ännerungen och ënnerschiddlech Urspréng hunn. Verschiddener ginn zréck op Decisiounen vun der Cour constitutionnelle, déi verschidden Ännerungen verlaangt hunn oder zumindest implizitt verlaangt hunn. Anerer ginn zréck op Accorde mat de Sozialpartner. An nach anerer hunn ze di mat enger Zort Toilettag vun aktuellen Dispositiounen.

Eng ganz Rëtsch vu menge Virriedner si schonn op déi verschidde positiv Verännerungen agaangen, zum Beispill d'Berechnung vum Krankengeld, déi präziséiert gëtt, datt d'Notioun vum Emploi approprié präziséiert gëtt oder datt et och eng licht Verännerung an der Opdeelung vun de Congésdeeg gëtt. Et gëtt och weiderhin d'Méiglechkeet fir en Demandeur d'emploi agefouert, eng Dispens unzefroen, sech um Arbeitsamt presentéieren ze mussen, gradesou wéi fir deen Demandeur, deen amgaangen ass, seng eegen Entreprise op d'Been ze stellen.

Et gëtt eng Indemnité de formation agefouert fir den Demandeur d'emploi, deen net indemniséiert ass. Dat ass sécherlech positiv ze bewäerten. An och gëtt mat deemem Text kloer gestallt, datt den Employeur dem Fonds pour l'emploi d'Chômagegeld vum Salarié muss zréckbezuelen, wann dee weinst enger Faute grave vum Patron demissionéiert huet.

Mir begrëssen och ausdrécklech d'Schafung vun enger Base légale fir de RETEL, de Réseau d'étude sur le marché du travail et de l'emploi, an erwaarden eis och dovunner méi en déif gräifend Verständnis vum Fonctionnement vum Aarbechtsmaart an och vun der Aarbechtswelt a virun allem och de Verännerungen, déi an hir stattfannen.

Duerfir erlaabt mer, Här President, vläicht op déi Punkten anzegoen, déi mir méi kritisches ge-

sinn, respektiv bei deene mer fannen, datt d'Regierung um hallwe Wee stoe bliwwen ass, oder déi awer zumindest och zweeschneideg Auswierkungen hunn.

Dat Éischt ass d'Dispositioun, déi seet, datt et de Studenten elo méiglech ass, 15 Stonnen amplat vun zéng Stonne während hire Studienzäiten ze schaffen. Dat entsprécht an eisen Aen op jidde Fall engem reale Besoin, net nëmme fir d'Studium ze finanzéieren, mä och, mengen ech, fir sech säi Liewe kënnen als Student ze finanzéieren. A mir mengen, datt dat och eng richtig Mesure ass.

Mä mer mengen oder mer bedauern awer, datt dee Seuil op 15 Stonne reduzéiert ass an net op 16 Stonnen d'Woch respektiv 64 Stonnen de Mount an d'Luucht gehuewe ginn ass, soudatt och déi Leit d'Aarbechtszäiten, déi se geschafft hunn, ganz unerkannt kréie bei der spéiderer Berechnung vun hirer Pensiounscarrière.

An ech mengen, datt déi Fro ëmsou méi wichteg ass, well mer jo och wëssen, datt an deenen nächste Méint, huelen ech emol un, mer erëm wäerte befaasst si mat Diskussiounen ronderëm eise Pensiounssystem. A grad do ass et, mengen ech, wichteg och op d'Studenten anzegoen, an och grad virun deem Hannergrond, datt eng ganz Rëtsch Akteure jo fuerderen, datt ee méi laang schaffe misst, eppes, wat mir net mengen. Mä grad déi misste sech jo dann awer bewosst sinn, datt d'Studienzäiten, zumindest déi Aarbecht, déi do geleescht ginn ass, och misst unerkannt ginn.

Also, et hätt ee kënnen engersäits de Seuil an deemem Gesetz eropsetzen op 16 Stonnen, well dat ass deen, bei deem et dann ufänkt, unerkannt ze ginn, oder et hätt ee kënnen kucken, am Code de la sécurité sociale Dispositiounen anzeféieren, déi speziell op d'Studente gemënt wieren. Dat ass an eisen Aen eng verpaste Chance a mer bedauern dat och.

Viru knapp zwee Joer huet d'Verfassungsgericht geuerteelt, datt e Salarié, dee gekënnegt huet weinst enger Faute grave vu sengem Patron, déiselwecht Uspréch op Entschiedegung huet wéi e Salarié, deen ongerechtfergt entlooss ginn ass.

Mat deemem Projet ginn déi zwee Fäll alignéiert, wat d'Rechter vum Salarié op eng Indemnité de préavis ugeet. Och dat begrësse mer natierlech. Mä mer mengen awer och an deemem Fall, zesumme mat der Salariatskummer, datt et wichteg wier, datt vun där Indemnitéit och Sozialversicherungscotisationsen erhuewe ginn, well jee no Préavis, deen een zegutt huet, dat scho fir déi Persoun, déi betrafte Persoun, tëschent zwee a sechs Méint Pensiounscarrière kann ausmaachen.

Am problemateschste gesi mir awer, an et ass virdrun och vun de Riedner ugeschwat ginn, déi nei Modalitéite fir d'Aide au réemploi. Mir hu kee Problem domat, datt, wa gesot gëtt, déi Abusen, déi bis elo stattfonnt hunn, déi zu enger Subventionéierung eigentlech vum Employeur gefouert hunn, d'Madamm Bofferding huet et pervers genannt, déi zumindest forttement indécent war, datt dogéint virgaange gëtt.

Dat heescht, och déi Dispositioun, datt ee seet, datt d'Aide au réemploi net méi wéi 50% vum Salaire ka sinn, deen de Patron gëtt, ënnerstëtze mer. Mä mer hunn awer Problemer mat deenen neie Restriktiounen, déi agefouert ginn, notament datt ee muss zwee Joer virdrun an engem lëtzebuergesche Betrib geschafft hunn an datt zweetens eng Ënnerscheedung gemaach gëtt tëschent deene Salariéen, déi iwwer 45 Joer hunn an am Chômage sinn, an deene Leit ënner 45 Joer, déi doduerch per se net wéi déi aner en Urecht op déi Aide kréien.

Mir fannen et och problematesch, datt déi Aide au réemploi ka véier Joer ausbezuelt ginn, ofhängeg dovunner, wéi laang de Salarié virdrun an deem Betrib geschafft huet. Dat heescht, wann d'Konditioun elo ass, datt e muss virdrun zwee Joer geschafft hunn, huet en d'Méiglechkeet, zwee Joer déi Aide au réemploi ze kréien, wann e véier Joer virdrun do geschafft huet, geet dat véier Joer. Dat ass eng Proratiséierung, mengen ech, déi net zilfüh-

rend ass am Sënn, fir de Leit wierklech entgéintzekommen, an et schaaft souguer éischer nach eng weider Ongläichbehandlung.

Den Här Spautz ass virdrun agaangen op dee rezenten Arrêt vun der Cour constitutionnelle, wat den Artikel 631-2 ugeet, wou d'Cour gesot huet, datt den Delai, wéini een déi Demande ka maachen, muss am Gesetz stoen an net méi därer iwwer Règlement grand-ducal définiert ginn. Dat gëtt mat deemem Text gemaach. Nawell bleift de 631-2 bestoen a mer musse sécherlech och un deen erугоen, well soss komme mer iwwer kuerz oder laang an e Widersproch.

Här President, mir wënschen eis och fir d'Zukunft, wa mer iwwer all déi verschidde Beschäftigungsmoossnamen oder -initiative schwätzen, datt mer vläicht op méi engem präzisen Zuelematerial schaffe kéinten iwwert d'Wierksamkeet vun deenen eenzelne Mesuren, fir erauszefannen, wat wierklech zillführend ass a respektiv wou ee Verännerung muss virhuelen. A mer mengen och, datt et néideg a wichteg wier, d'Verbesserungen am Schutz vun de Salariéen am Fall vu Faillitte weiderzedreien.

Här President, wann ech am Ufank gesot hunn, datt dëse Projet engem e bësse virkéim wéi e Fléckenteppech, mengen ech, datt een awer och soe kéint, et kënn ee sech e bësse vir wéi bei der lechternacher Sprangpressessioun: dräi Schrëtt no vir, zwee zréck. Verschidde ganz positiv Verbesserung stinn awer punktuell Verschlechterung géigeniwwer. Mä bon, vläicht ass de Minister Schmit jo och duerfir Spëtze-kandidat vun der LSAP am Osten.

Ech soen lech Merci.

(*Hilarité et brouhaha*)

► **M. Mars Di Bartolomeo**, *Président*.- D'Wuert huet elo den Aarbechtsminister, den Här Nicolas Schmit.

Prise de position du Gouvernement

► **M. Nicolas Schmit**, *Ministre du Travail, de l'Emploi et de l'Économie sociale et solidaire*.- Merci, Här President. E grouse Merci fir d'Éischt un d'Rapportrice fir de Rapport an och fir eng ganz Rei vun Interventionen, och déi méi humoristesche Interventionen. Ech mengen, dat muss och erlaabt sinn.


Deen heite Projet ass ee Projet, deen effektiv eng ganz Rei vun Aspekter touchéiert. An elo hätt ech lech och kënnen sechs oder siwe Projete separat presentéieren. Dann hätt Der zu all Projet eenzel d'Wuert geholl, an da weess ech net, ob mer méi séier virukomm wiere wéi elo.

Hei hu mer effektiv eng Rei vu Reformen zesummedoen an engem Projet, deen effektiv verschidden Aspekter vun onsem Droit du travail, vum Code du travail verännert, changéiert, verbessert. Ech mengen, dat ass einfach pragmatisch virgoen. A mir wëssen alleguerten, datt onsen Droit du travail sech permanent muss upassen, datt mer bei de Mesuren, déi mer hunn, fir géint de Chômage virzegoen, ëmmer erëm Upassung musse virhuelen.

An de Chômage ass jo op där richteger Pente, dat heescht der Pente descendante, 5,6. An ech hoffen, datt mer och nach weider kënnen erofgoen duerch dat geziilt Asetzen op där enger Säit vun der Beschäftigungspolitik, op där anerer Säit natierlech och duerch eng gutt Konjunktur.

Wéi gesot, mir hätten elo ee Gesetz fir d'Aide au réemploi, ee Gesetz fir d'Lohnfortzahlung, ee Gesetz fir d'Studentenaarbecht kënnen maachen. Ech weess net, ob dann d'Chamber méi effikass hätt kënnen an deem Kader schaffen. Duerfir, wann ech gelift, e bësse pragmatisch dat Ganz kucken an och kucken, wéi een am séiersten an am beschte virukënn!

Dat Zweet, dat ass, datt dat Gesetz hei eng Rei vu Sécherheeten an onst Aarbechtsrecht bréngt, do, wou keng waren. An deen éischte Punkt ass natierlech d'Lohnfortzahlung. An ech weess, datt de President do ganz sensibel ass, well et ass ee vu senger Meeschterwierker als Sozialminister: de Statut unique. Dat, wat awer ganz oft och déi heite Chamber beschäftigt huet, war d'Fro: Wéi ass et mat der Lohnfortzahlung an dem Statut unique?



d'Chamber online op www.chd.lu



Déi eng hu gesot: „Ma, d’Lohnfortzahlung, esou wéi se virdrun existéiert huet, dat heescht, wann een zum Beispill sonndes schafft an et gëtt ee krank, da kritt een de vollen Ausgleich, esou war dat net ofgemaach!“ An déi aner hu gesot: „Dach, dat war esou ofgemaach!“

An ech weess, datt ech selwer op eng oder déi aner Question parlementaire geäntwert hunn. An ech hu mech ëmmer inspiréiert u mengem Virgänger, dem Här Biltgen, deen zesummen dat mam President gemaach huet. An och den Här Biltgen huet do e bësse sibyllinisch geäntwert, wou en hätt kënne soen: „Jo, d’Lohnfortzahlung geet weider.“ Mä ganz kloer war et net.

An dat huet mat sech bruecht, datt an enger Rei vun Entreprises d’Lohnfortzahlung applizéiert ginn ass, esou wéi virdrun - dat heescht, d’Leit hunn dee vollen Ausgleich kritt, wa se krank waren -, an an aneren Entreprises dat net de Fall war. Déi, déi d’Interpretatioun hatten, déi natierlech vum Patronat verteidegt ginn ass, an déi gesot hunn, dat wier esou an deenen Negotiatiounen ofgemaach ginn, hu se net applizéiert.

Elo kënne mer jo net indefiniment akzeptéieren, datt eng Regel do gëllt an do net gëllt. Ech mengen, do mussen mer ganz einfach eng Sécurité juridique hunn, an déi hu mer elo. Déi wäerte mer elo kréien, wann dee Projet hei gestëmmt ass. A jiddwereen, jiddwer Salarié soll gläichwäerteg behandelt ginn.

An ech kann lech soen, dat war eng laang, laang Diskussioun an Negotiatioun, well wann natierlech déi verschidde Parteie vu ganz verschiddene Point-de-vuen ausginn, dann ass et kloer, datt et net einfach ass, se iergendwéi op een Nenner ze bréngen. Mir hunn dat gemaach mam plus ou moins Accord vum Patronat, dat sech elo natierlech erëm e bëssen dovun distanzéiert huet.

Mä ech mengen, datt déi Léisung hei gutt ass, well déi Leit, déi wierklech no Schichte schaffen, regelméisseg, déi kréien dat, wat se eigentlech och an der Vergaangenheet kritt hätten, esou wéi de System vun der Lohnfortzahlung funktionéiert huet. An déi, déi ganz episodesch emol heiansdo Schichte schaffen oder sonndes schaffen, déi kréien dat gerechent op eng Period vu sechs Méint. Dat heescht, wa se ni virdu geschafft hunn, dann ass d’Differenz ganz kleng an dann huet dat och weenig Incidence fir den Employeur.

Duerfir mengen ech: Déi Sécurité juridique ass extrem wichteg an deem doten Dossier. Zéng Joer Statut unique, zéng Joer, mir hunn d’Lohnfortzahlung gekläert a mer hu se preservéiert. Ech mengen, dat kënne mer zesummen unerkennen.

Déi zweet Sécurité juridique, dat ass déi, déi vu verschiddenen Intervenanten hei genannt ginn ass, datt mer an der Vergaangenheet Saache geregelt hunn iwwer Reglementer, déi (veuillez lire: déi an ee Gesetz gehéieren), seet zumindest d’Cour constitutionnelle. An dat wat d’Cour constitutionnelle seet, dat mussen mer tel quel esou unhuelen, well soss bräichte mer keng Cour constitutionnelle. An duerfir hu mer e Problem gehat bei der Aide au réemploi a bei dem Emploi approprié, déi zwou Mesuren, déi iwwer Reglementer definéiert waren a wou d’Cour constitutionnelle ons ganz kloer gesot huet: Dat geet net, dat muss an engem Gesetz definéiert sinn. An duerfir hu mer dat elo gemaach.

Dat heescht, dee Projet bréngt hei och eng Sécurité juridique, déi mer virdrun net haten.

Ech wëll elo net op déi verschidden Aspekter nach eemol agoen, zum Beispill d’Fro vun de Studenten, wou gesot ginn ass: Et ass schon esou, datt mer dat op 15 Stonne limitéiert hunn. Hei geet et jo net nëmmen ëm Lëtzebuerger, hei geet et net nëmmen ëm Residenten. Hei geet et och ëm eng ganz Rei vun anere Studenten, déi op Lëtzebuerg kommen, déi da géifen hei kotiséieren, Rechter op eemol kreéieren, wou mer herno grouss Problemer hätten, wéi déi Rechter sech konkretiséiere géifen.

Elo weess ech awer och, datt hei zu Lëtzebuerg jo d’Zäiten zumindest ugerechent ginn, wann ee studéiert. Déi kritt een ugerechent. Also ass, mengen ech, déi Problematik vum Kotiséieren (veuillez lire: net ginn), well de Student verdéngt jo elo net esou héich Montanten. Hei geet et elo ëm Studentenaarbecht, dat heescht net ëm Salären, déi esou héich sinn, datt dat herno eng gréisser Incidence op den Niveau vu senger Pensioun hätt. An duerfir ze mengen, wa mer dat elo op 18 Stonne gehéicht hätten, dann hätte mer domat iergendwéi e gréissere Schrott gemaach am Regimm vun onse Pensiounen. Dat, mengen ech, ass e bëssen oder schonn e bësse vill iwwerdrifwen.

Iwwert den Emploi approprié wëll ech och ee Wuert soen. Dee war an engem Reglement geschriwwen. Mir hunn dat also an ee Gesetz gesat an e bëssen amenagéiert. Et ass also net 100%eg dat nämlecht. Ech géif net soen, datt

dat elo d’Willkür vun der ADEM géif anerken. D’ADEM huet keng Willkür. Dat wëll ech hei ganz kloer soen. An de Punkt ass deen, datt muss kloer festgestallt ginn: Wat ass en Emploi approprié? Dat heescht, wann eng Persoun, déi am Chômage ass, en Emploi offréiert kritt, wéini ass deen Emploi „zumutbar“, wéi dat op Däitsch heescht, a wéini net? An duerfir brauche mer kloer Kritären. D’Cour constitutionnelle huet gesot: Déi mussen mer an e Gesetz aschreiwen. An da mussen déi och applizéiert ginn.

Et kann net sinn, datt all Efforte gemaach gi fir Leit an Aarbecht ze bréngen an ëmmer erëm en Debat kënnt: Nee, deen doten Job, dee gefält mer net, deen doten ass net hei oder deen doten ass net do. Hei ass einfach eng kloer Linn ze fuere, fir ze soen: Dat doten ass en Job, dee passt vum Salaire, vun der Qualifikatioun, vun de Konditiounen, vun der Familijsituatioun, vun der Distanz hier an esou weider. Hei brauche mer kloer Kritären. Déi hu mer elo per Gesetz an déi mussen mer och esou applizéieren.

Mäi leschte Punkt ass, fir just deen ze huelen, effektiv d’Aide au réemploi. Do muss ech zwar dem Här Spautz - bei deem ech ganz appreciéieren, wat en hei gesot huet - soen, datt mer hei mot à mot dat suivéiert hunn, wat mat de Sozialpartner ofgemaach ass. Dir musst elo net nach deen Accord - deen ass scho laang hier, 2014; do gesitt Der, wéi laang Zäit mer gebraucht hunn -, ech wëll lech deen elo net virliessen, mä ech kann lech en herno ginn. Do steet genau dat dran, wat elo am Gesetz steet.

Déi 50%, déi véier Joer, alles dat, déi 90% vum Salaire vu virdrun, de Plaffong vun 3,5, genau dat steet an deem Accord, wat mer elo hei ëmgesat hunn. Et ass also net eppes, wou mer en Accord gemaach hunn an dann e bësse gefuscht hu lénks a riets. Dat ass genau d’Applikatioun vun dem Accord. 50% ass de Maximum vun deem, wat de Stat ka gi par rapport zum Salaire, deen den Employeur bezilt. Wat gesot ass, an dat ass och esou verstanen, dat ass: Wann e Salarié mat der Aide au réemploi net dee Seuil erreecht, deen als Emploi approprié definéiert ass, wat sai Salaire ubelaangt, dann ass et keen Emploi approprié an e muss deen Job och net unhuelen.

Dat ass e Lien dee gemaach gëtt tëschent der Aide au réemploi, op där enger Säit, déi Definition, déi vun de Gewerkschaften esou akzeptéiert ginn ass, an dem Emploi approprié. Dat heescht, wann dee Salaire, deen de Patron bezilt, plus d’Aide au réemploi, net dat representéiert, wat als Salaire an der Definition vum Emploi approprié definéiert ass, da muss en deen Job net unhuelen. Dat ass also och do eng Souplesse an eng Korrektioun an eng besser Präzisoun, géif ech soen, déi mer hei virgeholl hunn.

Just ee Wuert, well dat elo ugeschwat ginn ass, 2016 hate mer 3.000 Dossiere fir Aide au réemploi an dovun waren der 946, wou d’Aide au réemploi méi héich war wéi de Salaire, deen den Employeur bezuelt huet. An dat ass einfach net normal. Esou wéi et net normal ass, datt, egal wat fir eng Qualifikatioun se hunn., d’Leit per Definition agestallt gi si mam Mindestloun an de Stat huet dann x-mol de Mindestloun bis praktesch iwwer zweemol de Mindestloun dropgeluecht, fir dann de Maximum ze errechen, op deen déi Persoun eventuell da Recht hat.

Dat hu mer korrigéiert. Firwat hu mer dat korrigéiert? Well dat natierlech Distorsiounen um Aarbechtsmaat schafft. Well natierlech dann deen, deen eng Aide au réemploi zegutt huet, par rapport zu allen anere Leit, déi och en Job gär hätten, sech besser positionéiert wéi all déi aner. D’Fro: Firwat hu mer déi Leit ënner 45 mat Ausnam vun deenen, déi aus engem Licenciement kommen, mat Ausnam vun deenen, déi aus engem Plan social kommen, mat Ausnam vun deenen, déi aus engem Plan de maintien kommen - firwat hu mer déi erausgeholl? Fir d’Generaliséierung. All Chômeur huet e Recht op Aide au réemploi.

Et ass ganz einfach. Wann Der jiddwerengem déi nämlecht Mesure gitt, da gitt Der kengem eng. Dat heescht, da cibléiert Der net déi Leit, déi besonnesch eng Aide mussen hunn. A wie brauch dann déi meeschten Aiden, fir erëm Fouss ze faassen um Aarbechtsmaat? Ben, dat sinn déi, déi e bësse manner jonk sinn. Dat sinn déi Leit, déi en plus eng gewësse Carrière hunn, e gewëssenen Niveau hu vun hirem Revenu an déi fannen net de Revenu an donieft fanne se och méi schwierig en Job. An duerfir ass dat hei scho kohärent, compte tenu och vun deenen Experienzen, déi mer gemaach hunn.

Mäi leschte Punkt ass, Dir hutt gesot, den Accord, iwwert d’Kannergeld wëll ech elo näischt soen, dat ass net mäi Ressort. Mir hunn zwee Punkten, déi effektiv net vollkommen erfüllt sinn. Dat ass déi Combinaisoun Retraite partielle, Travail partiel. Do ass awer en Avant-projet do. Mä dat ass och eng Joint Venture mat

Sommaire des séances publiques n°s 21, 22 et 23

21^e séance

Ouverture de la séance publique p. 272

7118 - Projet de loi portant modification

1° de la loi électorale modifiée du 18 février 2003;

2° de la loi modifiée du 4 février 2005 relative au référendum au niveau national p. 272-278

7191 - Projet de loi portant approbation de l’Accord de coopération en matière de partenariat et de développement entre l’Union européenne et ses États membres, d’une part, et la République islamique d’Afghanistan, d’autre part, fait à Munich, le 18 février 2017 p. 278-280

7193 - Projet de loi portant approbation de l’Accord instituant la Fondation internationale UE-ALC, signé à Saint-Domingue, le 25 octobre 2016 p. 280-281

7197 - Projet de loi portant approbation du Protocole sur les privilèges et immunités de la juridiction unifiée du brevet, fait à Bruxelles, le 29 juin 2016 p. 281-282

7178 - Projet de loi portant approbation de l’Accord entre le Gouvernement du Royaume de Belgique, le Gouvernement du Grand-Duché de Luxembourg, le Gouvernement de la République française et le Gouvernement du Royaume des Pays-Bas relatif à la coopération en matière de défense aérienne contre les menaces aériennes non militaires, fait à Bruxelles, le 16 février 2017 p. 282-284

7161 - Projet de loi portant modification de la loi modifiée du 26 octobre 2010 portant réorganisation de la Chambre de Commerce p. 284

Ordre du jour p. 284

7224 - Projet de loi portant approbation de l’Accord entre le Grand-Duché de Luxembourg et la République de Lituanie sur les transferts statistiques d’énergie produite à partir de sources renouvelables afin de respecter les objectifs prévus par la directive 2009/28/CE, signé à Vilnius, le 26 octobre 2017

et

7225 - Projet de loi portant approbation de l’Accord entre le Grand-Duché de Luxembourg et la République d’Estonie sur l’établissement d’un cadre pour le transfert statistique d’énergie produite à partir de sources renouvelables afin de respecter les objectifs prévus par la directive 2009/28/CE, signé à Tallinn, le 7 novembre 2017 p. 284-286

22^e séance

Ouverture de la séance publique p. 287

Question élargie n°27 de M. Fernand Kartheiser au sujet du passage de l’Enseignement secondaire à l’Enseignement supérieur p. 287-288

7155 - Projet de loi modifiant la loi modifiée du 15 juillet 2011 visant l’accès aux qualifications scolaires et professionnelles des élèves à besoins éducatifs particuliers p. 288

Débat de consultation sur la problématique du logement p. 288-304

Dépôt d’une proposition de loi par M. David Wagner p. 302-303

23^e séance

Ouverture de la séance publique p. 305

Communications p. 305

7257 - Proposition de loi portant modification de la loi modifiée du 21 septembre 2006 sur le bail à usage d’habitation et modifiant certaines dispositions du Code civil p. 305

Ordre du jour p. 305

Déclaration de M. Jean Asselborn, Ministre des Affaires étrangères et européennes, sur la politique européenne et étrangère p. 305-311

7086 - Projet de loi portant modification: 1) du Code du travail; 2) de la loi modifiée du 24 décembre 1996 portant introduction d’une bonification d’impôt sur le revenu en cas d’embauchage de chômeurs; 3) de la loi modifiée du 12 septembre 2003 relative aux personnes handicapées p. 311-315

dem Minister vun der Sécurité sociale. Mä mir kënnen dee Projet nach deposéieren a relativ kuerzer Zäit.

An dee leschte Punkt ass e Punkt, dee mer besonnesch um Häerz läit, deen awer och net integral a meng Kompetenz fält, dat ass dee vun der 52. Woch. An do ware vill Diskussiounen an der CNS, an ech bedauere ganz staark, datt et net méiglech war, bis elo eng Léisung an der CNS - an d’CNS ass net nëmmen d’Regierung, dat sinn och d’Sozialpartner - eng valabel Léisung am Kader vun deem Problem vun der 52. Woch ze fannen. Ech hoffen, datt dat nach an enger ganzer noer Zukunft méiglech wäert sinn, well dat huet natierlech e Lien mam Reklassement. A mir kucken och, wat de Reklassement ubelaangt, ob mer do net nach e puer Korrekturen un dem aktuelle Gesetz kënnen ubréngen.

Merci.

► **Plusieurs voix.** - Très bien!

► **M. Mars Di Bartolomeo, Président.** - Merci och. Wann ech dat richteg gesinn, si mer prett, fir ofzestëmmen.

Vote sur l’ensemble du projet de loi 7086 et dispense du second vote constitutionnel

An d’Ofstëmmung fänkt direkt un. Fir d’Éischt déi perséinlech Stëmmen. An dann d’Procuratiounen. An d’Ofstëmmung ass elo eriwwer.

57-mol Jo an zwou Abstentiounen. Domat ass de Projet de loi ugeholl.

Résultat définitif après redressement: le projet de loi 7086 est adopté par 58 voix pour et 2 abstentions.

Ont voté oui: Mmes Diane Adehm, Sylvie Andrich-Duval, Nancy Arendt, MM. Emile Eicher, Félix Eischen (par Mme Françoise Hetto-Gaasch), Léon Gloden (par Mme Octavie Modert), Jean-Marie Halsdorf, Mmes Martine Hansen, Françoise Hetto-Gaasch, MM. Aly Kaes, Marc Lies (par Mme Diane Adehm), Mme Martine Mergen, M.

Paul-Henri Meyers, Mme Octavie Modert, MM. Laurent Mosar, Marcel Oberweis, Gilles Roth, Marco Schank, Marc Spautz, Serge Wilmes (par Mme Nancy Arendt), Claude Wiseler, Michel Wolter et Laurent Zeimet;

MM. Marc Angel, Frank Arndt, Alex Bodry, Mmes Taina Bofferding, Tess Burton, M. Yves Cruchten, Mme Claudia Dall’Agnol, MM. Mars Di Bartolomeo, Georges Engel (par Mme Claudia Dall’Agnol), Franz Fayot, Claude Haagen, Mme Cécile Hemmen et M. Roger Negri;

MM. André Bauler, Gilles Baum, Mme Simone Beissel, MM. Eugène Berger, Frank Colabianchi, Lex Delles, Mme Joëlle Elvinger, MM. Gusty Graas, Max Hahn, Alexander Krieps, Claude Lamberty, Edy Mertens et Mme Lydie Polfer (par M. André Bauler);

MM. Claude Adam, Gérard Anzia (par Mme Viviane Loschetter), Henri Kox, Mmes Josée Lorsché (par M. Claude Adam), Viviane Loschetter et M. Roberto Traversini (par M. Henri Kox);

MM. Gast Gibéryen, Fernand Kartheiser et Roy Reding (par M. Fernand Kartheiser).

Se sont abstenus: MM. Marc Baum et David Wagner.

Ass d’Chamber bereet, fir d’Dispens vum zweete Vott ze froen? Ass dat esou?

(Assentiment)

Ma dann ass dat esou decidéiert an ech soen lech Merci. Mir sinn um Enn vun eisen Aarbechte vun de Mëtten ukomm. Rendez-vous muer de Mëtten um zwou Auer fir den Debat iwwert d’Aussen- an d’Europapolitik.

Merci. An d’Sëtzung ass elo eriwwer.

(Fin de la séance publique à 17.45 heures)